



# KOMUNA E MALISHEVËS



# BULETINI

Nr. 133- Dhjetor 2014 ZYRA PËR INFORMIM - <http://kk.rks-gov.net/malisheve/>



Oborri i tregut në Malishevë



Panairi i veshjeve dhe ushqimeve tradicionale



Asfaltimi i rrugës në Vërmicë



Shkolla në Gollubovc



## **Përmbajtja:**

KPF me disa rekomandime për KK .....	3
Administrata komunale, e përgatitur për ofrimin e shërbimeve për mërgimtarët.....	3
Handikos falënderon kryetarin Begaj për përkrahje.....	4
Si pasojë e eksplozimit të gazit, humbi jetën punëtori i shkollës.....	5
KK i Malishevës mbajti mbledhjen e dymbëdhjetë .....	6
U mbajt mbledhje komemorative për Zymer Hotin .....	6
Këshilli i Drejtorëve mbajti mbledhjen e radhës.....	7
Shtrohen rrugët në Vërmicë dhe Mleqan .....	8
Komiteti për Komunitete mbajti mbledhjen e dhjetë të radhës .....	8
Komuna ndihmon fermerët .....	9
Ligji për skemën sociale rrezikon të lë jashtë listës shumë familje .....	9
Kërkohet përkujdesje e zonave të mbrojtura .....	10
Begaj: Mbi 31 kilometra rrugë të ndërtuara gjatë këtij viti .....	12
U hap panairi i veshjeve dhe ushqimeve tradicionale .....	13
Kopja e altarit që i kushtohet hyjneshës “Nemezë” kthehet në Malishevë .....	14
Begaj: 2014-ta vit i suksesshëm .....	14
KKSB mbajti mbledhjen e fundit për vitin 2014.....	16
KK i Malishevës mbajti mbledhjen e fundit për këtë vit .....	17
Komiteti për Diasporë mbajti mbledhjen e fundit për këtë vit.....	17
Gëzim Elshani, sportisti i vitit në Malishevë, me 13 medalje ari .....	18



## **KPF me disa rekomandime për KK**

### **Malishevë, 1 dhjetor**

Komiteti për Politikë dhe Financa (KPF), drejtuar nga kryesuesi i KK të Malishevës, z.Enver Hoti, mbajti mbledhjen e njëmbëdhjetë të rregullt. Në këtë mbledhje, janë trajtuar një varg çështjesh dhe u dhanë disa rekomandime për mbledhjen e ardhshme të Kuvendit të Komunës.

Për mbledhjen e ardhshme të Asamblesë Komunale KPF, rekomandoi shqyrtimin dhe miratimin e Udhëzimit Administrativ (MAPL), për procedurat e themelimit, përbërjen dhe kompetencat e Komiteteve të përhershme në Komunë, pastaj Formimi i panelit përzgjedhës për zgjedhjen e anëtarëve të Komitetit Konsultativ sipas Udhëzimit Administrativ, për organizimin dhe funksionimin e Komiteteve Konsultative në Komuna, dhe sipas vendimit të Kuvendit për themelimin e Komitetit Konsultativ në Komunën e Malishevës.

Komiteti për Politik dhe Financa (KPF), për mbledhjen e ardhshme të Kuvendit Komunal dha edhe këto rekomandime: Ridizajnimi i sallës së Kuvendit Komunal, rekomandim tjetër ishte edhe miratimi i rekomandimeve të Komitetit për Arsim : a) mbledhjet e trupave të kuvendit të mbahen prej orës 14:00, b) të funksionalizohet puna e komisionit të Komitetit për Arsim.

## **Administrata komunale, e përgatitur për ofrimin e shërbimeve për mërgimtarët**

### **Malishevë, 1 dhjetor**

Komuna e Malishevës, ka marrë të gjitha masat dhe ka bërë të gjitha përgatitjet e duhura, për pjesën e dytë të dhjetorit, kur pritet të ketë fluks të qytetarëve që kanë nevojë për nxjerrjen dhe rregullimin e dokumenteve, e ky fluks pritet të jetë nga mesi i dhjetorit, kur edhe vijnë mërgimtarët për festat e fundvitit.

Kështu tha drejtori i administratës z.Ekrem Kastrati, në mbledhjen e rregullt të Këshillit të Drejtorëve, mbledhje të cilën e udhëhoqi i pari i Malishevës, z.Ragip Begaj. Sipas drejtorit Kastrati, janë të furnizuar mirë për formular dhe material tjetër përcjellës, në mënyrë që shërbimet ndaj qytetarëve, edhe kur ka fluks të tyre, të jenë të shpejta dhe efikase.

“Ndryshimet klimatike, kanë rritur numrin e pacientëve edhe në qendrat mjekësore të Malishevës, ndërsa numri pritet të rritet edhe më shumë gjatë këtij muaji, që është normale në këtë periudhë të vitit”, tha drejtori i shëndetësisë, z.Hajdin Berisha.

Edhe drejtorët tjerë raportuan për punën e tyre, dhe përfundimin e projekteve, pasi jemi në prag të përfundimit të vitit kalendarik, si dhe raportuan për përgatitjet që janë duke i bërë për vitin e ardhshëm.

Në fillim të mbledhjes së sotme, kryetari Begaj, ka kërkuar nga drejtorët të bëjnë përmbledhjen e punëve gjatë këtij viti, përderisa tha se “Jemi munduar ti rrumbullakojmë të gjitha projektet, e të cilat nuk janë pak, por kjo nuk do të thotë që ne të jemi të kënaqur me punën e bërë, por duhet edhe me shumë të angazhohemi”.

## Handikos falënderon kryetarin Begaj për përkrahje

### Malishevë, 3 dhjetor



Kryetari i Komunës së Malishevës, z.Ragip Begaj, ka pritur sot një delegacion nga Qendra e Rehabilitimit “Handikos” në Malishevë. Kjo vizitë e Handikos, është bërë në kuadër të shënimit të Ditës Ndërkombëtare për Personat me Aftësi të Kufizuara dhe me këtë rast, ky delegacion i Handikos-it, e ka falënderuar kryetarin Begaj për mbështetje.

“Ne si komunë, jemi përpjekur gjithmonë që brenda mundësive buxhetore, t’ju ofrojmë mbështetje dhe të krijojmë kushte më të mira për qendrën e rehabilitimit, por kufizimet buxhetore, po na kufizojnë edhe neve si komunë, që ndoshta edhe të mos ju përkrahim sa duhet”, tha Begaj.

Ndërsa menaxherja e Qendrës së Rehabilitimit “Handikos” në Malishevë, znj.Feride Hoxha, e falënderoi kryetarin Begaj, për mbështetjen e vazhdueshme. “Ne ju falënderojmë për përkrahjen

që na jepni dhe falë kësaj ne po përpiqemi t'ju ofrojmë shërbimet e nevojshme personave me aftësi të kufizuara”, tha znj.Hoxha.

Në këtë datë, menaxherja e Handikos-it në Malishevë, shfrytëzoi rastin të shpreh pakënaqësinë e saj, për moskrijimin e kushteve në disa institucione, për qasje në objekte, për rreth 70 persona nga Malisheva, të cilët lëvizin me karrocë.

## Si pasojë e eksplozimit të gazit, humbi jetën punëtori i shkollës

### Malishevë, 5 dhjetor



Sot në orët e para të mëngjesit, në shkollën fillore dhe të mesme të ulët “Ibrahim Mazreku” në Malishevë, ka ndodhur një rast i rëndë, ku ka humbur jetën një punëtor teknik, si pasojë e eksplozimit të nxemjes me gaz në këtë shkollë.

Zymer B. Hoti (1971) nga Malisheva, punëtor teknik në këtë shkollë, ka humbur jetën, përderisa kishte hyrë në objektin ku gjendet ngrohja e shkollës, e

cila në atë moment kishte eksploduar.

Menjëherë në vendngjarje kanë dalë Policia e Kosovës dhe ekipet e shpëtimit, si dhe Kryetari i Komunës së Malishevës, Ragip Begaj, nënkryetari Rexhep Mazreku, drejtori i arsimit Blerim Thaçi, drejtori për mbrojtje dhe shpëtim Ahmet Morina, dhe drejtor e zyrtar tjerë komunal.

Me këtë rast, Kryetari i Komunës së Malishevës, “i shpreh ngushëllimet më të thella familjes Hoti dhe farefisit të gjerë nga Malisheva” dhe këtë rast e quajti “një ngjarje e rëndë dhe tronditëse për të gjithë Malishevën”.

Organet e rendit, janë duke u marrë me rastin, ndërsa mësimi është ndërprerë përkohësisht në këtë shkollë.

## KK i Malishevës mbajti mbledhjen e dymbëdhjetë

### Malishevë, 5 dhjetor

Kuvendi i Komunës së Malishevës, kryesuar nga kryesuesi z.Enver Hoti, mbajti mbledhjen e dymbëdhjetë të radhës, mbledhja e cila filloi me një minutë heshtje, për rastin e humbjes së jetës së një punëtori në vendin e punës, në shkollën fillore në Malishevë, ndërsa ngushëllime familjes Hoti, i dërguan të gjitha grupet politike, anëtare të KK të Malishevës.


Përndryshe, KK i Malishevës, në mbledhjen e sotme, mori disa vendime, e të cilat lidhen kryesisht me punën e komiteteve dhe trupave të kuvendit. Fillimisht KK i Malishevës, formoi komisionin për ndryshimin dhe plotësimin e Rregullores për punën e kuvendit.

Më pas, KK i Malishevës, debatoi rreth punës së komiteteve dhe trupave tjerë të kuvendit, për numrin e mbledhjeve, si dhe pagesat që mund ti kenë këto trupa, ndërsa bazuar në udhëzimin administrativ të MAPL-së, për përbërjen e komiteteve, KK, mori vendim për zbritjen e numrit të anëtarëve të KPF-së, si dhe për ndryshimin e përbërjes së komitetit për komunitete.

Po ashtu në mbledhjen e sotme, KK, mori vendim për formimin e panelit zgjedhor për zgjedhjen e anëtarëve të Komiteti Konsultativ.

## U mbajt mbledhje komemorative për Zymer Hotin

### Malishevë, 5 dhjetor



Organizuar nga kolektivi dhe drejtoria e SHMU ‘Ibrahim Mazreku’, sot u mbajt një mbledhje komemorative, për punëtorin e kësaj shkolle, Zymer Hoti, i cili sot tragjikisht humbi jetën, pas aksidentit në kaldanë e ngrohjes së shkollës. Në këtë mbledhje, përveç kolektivit të shkollës, mori pjesë edhe kryetari i Komunës së Malishevës, Ragip Begaj, me bashkëpunëtorë, kryesuesi i KK të Malishevës, Enver Hoti, me anëtarët e KK të Malishevës dhe qytetar të shumtë të Malishevës.

Me këtë rast, kryetari i Komunës së Malishevës, z.Ragip Begaj, tha se kjo është humbje e madhe, pasi Zymeri, ka humbur jetën në vendin e punës dhe në shërbim të shkollës. “E nderuara familje



Hoti, të nderuar punëtor të kësaj shkolle, sot në mëngjes mora lajmin për rastin e humbjes së jetës, së një punëtori të vyeshëm, i cili humbi jetën aksidentalisht në vendin e tij të punës, e humbja e jetës në vend të punës, është e barabartë me një heroizëm. Të gjithë ndiejmë dhimbje, së bashku me ju. Në emër të Komunës së Malishevës, ju shprehi ngushëllimet më të sinqerta familjes dhe kolektivit të shkollës”, tha kryetari i Komunës së Malishevës, z.Ragip Begaj, në fjalën e rastit.

Për jetën dhe angazhimin e Zymerit, në këtë shkollë, nga viti 2003, foli mësuesi Hamdi Mazreku, sipas të cilit, “Zymeri ka qenë shembulli më i mirë i një punëtori në shkollë. I afërt, i dashur, bashkëpunues dhe i hareshëm me nxënës”.

Në emër të familjes, i vëllai, Vesel Hoti, i falënderoi të gjithë për pjesëmarrje dhe për ngushëllimet, ndërsa i ngushëlloi kolektivin e shkollës për humbjen e punëtorit të tyre.

Zymer Hoti, sot aksidentalisht ka humbur jetën, pas një shpërthimi në kaldanë e ngrohjes së shkollës. Zymeri ka lënë pas vetes gruan dhe dy vajza.

## **Këshilli i Drejtorëve mbajti mbledhjen e radhës**

### **Malishevë, 8 dhjetor**

Këshilli i Drejtorëve, drejtuar nga kryetari i Komunës së Malishevës, z.Ragip Begaj, ka mbajtur mbledhjen e radhës, ku janë trajtuar disa çështje, që lidhen me punët e drejtorive komunale, në përfundim të vitit, ku kryesisht është diskutuar për përfundimin e projekteve, nëse premtojnë kushtet atmosferike, si dhe për çështje tjera me rëndësi.

Në këtë mbledhje, temë kryesore e diskutimit, ishte ndërhyrja emergjente që duhet të bëhet në ngrohjen e shkollës fillore në Malishevë, aty ku javën e kaluar, kishte në aksident me sistemin e ngrohjes, e ku kishte humbur jetën një person, ndërsa është ndërprerë edhe mësimi, pasi tashmë, ajo shkollë nuk ka ngrohje. Në këtë mbledhje, u tha se duhet aktivizim i shpejtë i ngrohjes, në mënyrë që të mund të rifilloj mësimi në këtë shkollë.

Po ashtu në mbledhjen e sotme, drejtori për shëndetësi, z.Hajdin Berisha, falënderoi Këshillin e Drejtorëve për iniciativën, dhe të gjithë punëtorët e administratës komunale dhe të institucioneve tjera në Malishevë, për solidaritetin e treguar, me rastin e grumbullimit të mjeteve për ta ndihmuar 14 vjeçarin Ilir Berisha, i cili falë edhe ndihmës nga ministria e shëndetësisë, ka arritur të siguroj mjetet e nevojshme për ndërhyrjen kirurgjike, për transplantimin e veshkave dhe shpresohet në shpëtimin e jetës së këtij të riu.

Përveç diskutimit për çështje që lidhen me përfundimin e projekteve për këtë vit, i diskutua edhe për përgatitjet për vitin e ardhshëm, sidomos për projekte me rëndësi, të cilat duhet të fillohen nga tani të përgatiten, siç është fushata e masave parandaluese kundër etheve hemorragjike dhe të tjera.

## Shtrohen rrugët në Vërmicë dhe Mleqan

### Malishevë, 8 dhjetor



Në kuadër të ndërtimit të infrastrukturës rrugore nëpër vendbanimet e Komunës së Malishevës, sot ka filluar asfaltimi i një rruge në fshatin Vërmicë, ndërsa dje janë shtruar dy rrugë në Mleqan dhe një tjetër është duke u përgatitur për asfaltim dhe me këto rregullime, disa nga projektet kapitale, po shkojnë drejt përfundimit për këtë vit.

Asfaltimin e këtyre rrugëve, e ka parë nga afër sot, edhe Kryetari i Komunës së Malishevës, z.Ragip Begaj, i cili i ka uruar banorët e këtyre dy fshatrave, për rregullimin e rrugëve.

Nga ana tjetër, banorët e Vërmicës dhe Mleqanit, e kanë falënderuar kryetarin Begaj, për rregullimin e rrugëve dhe asfaltimin e tyre, pasi përveç lëvizjes më të lehtë, edhe nxënësit, fëmijët, tani e kanë më të lehtë ecjen nga shtëpitë deri në shkollat e tyre përkatëse.

## Komiteti për Komunitete mbajti mbledhjen e dhjetë të radhës

### Malishevë, 8 dhjetor

Komiteti për Komunitete, organ i Kuvendit të Komunës në Malishevë, i drejtuar nga kryetari i këtij komiteti, z.Fatmir Ademaj, ka mbajtur sot mbledhjen e dhjetë të rregullt, ku janë trajtuar një varg çështjesh të punës së këtij komitetit dhe për aktivitetet në vazhdim.

Kryesuesi i këtij komiteti z.Fatmir Ademi, para anëtarëve të komiteti, prezantoi planin e punës së këtij komitetit për vitin 2015, plan i cili i miratua nga ana e anëtarëve të këtij komiteti dhe u rekomandua për miratim në Asamblenë Komunale.

Ndër të tjera, u bë e ditur, se në kuadër të vizitave të grupeve të ndryshme të interesit, anëtarët e Komitetit për Komunitete e kanë vizituar edhe Qendrën për Rehabilitim Handikos, ku janë takuar me menaxheren e kësaj qendre znj.Feride Hoxha, e cila i ka njoftuar për punën e saj me personat me nevoja të veçanta, si dhe e ka falënderuar Komunën për përkrahjen e vazhdueshme të kësaj qendre rehabilituese.

## **Komuna ndihmon fermerët**

### **Malishevë, 11 dhjetor**



Drejtorja për Bujqësi e Pylltari dhe Zhvillim Rural (BPZHR) në Komunën e Malishevës, në mesin shumë investimeve në sektorin e bujqësisë dhe blegtorisë, sot ka realizuar edhe një projekt të këtij sektori, duke ndarë makina mjelëse për 9 fermer. Shuma e ndarë e mjeteve për këtë donacion nga komuna ishte 2700 euro.

Sipas drejtorit të BRZHR-së z. Hajrullah Mazreku, ky është vetëm fillimi i përkrahjes së punëve të fermerëve për ti lehtësuar dhe stimuluar, në aktivitetet të cilat i bëjnë çdo ditë nëpër stallat e tyre. “ Ne nuk do të kursejmë asgjë si institucion që të ju dalim në ndihmë të gjithë fermerëve të komunës sonë, në përpjekje për kushte më të mira dhe rritje të zhvillimit të bujqësisë në përgjithësi” tha drejtori Mazreku.

## **Ligji për skemën sociale rrezikon të lë jashtë listës shumë familje**

### **Malishevë, 15 dhjetor**

Ndryshimet që Ministria e Punës dhe Mirëqenies Sociale, ka bërë në ligjin e përfituesve të skemës sociale, rrezikon që shumë familje të mbesin pa këtë mbështetje të cilën deri më tani e kanë pasur një pjesë e familjeve, edhe nga Komuna e Malishevës, dhe largimet nga kjo skemë do ta rëndojnë edhe më shumë situatën sociale.

Kështu u bë e ditur sot në mbledhjen e Këshillit të Drejtorëve, ku drejtori për shëndetësi dhe mirëqenie sociale, z.Hajdin Berisha, ka paralajmëruar, se “ndryshimet që ministria ka bërë në këtë ligj, ku janë ashpërsuar kriteret për të qenë përfitues i skemës sociale, do të sjellë telashe



edhe për komunën, pasi shumë familje, mund të mos jenë më përfitues të saj dhe gjendja sociale e tyre, do të vështirësohet edhe më shumë”.

Përndryshe në mbledhjen e rregullt të Këshillit të Drejtorëve, drejtorët komunal raportuan për aktivitetet e drejtorive të tyre, në këtë përfundim të vitit dhe përmbylljes së projekteve, e të cilat janë jo pak të realizuara gjatë këtij viti, që do të prezantohen këtë të mërkurë në debatin me qytetar, që do të mbaj Kryetari i Komunës së Malishevës, z.Ragip Begaj.

## **Kërkohet përkujdesje e zonave të mbrojtura**

### **Malishevë, 16 dhjetor**

Komiteti për planifikim urban, kadastër, mbrojtje të mjedisit, turizëm dhe monitorim të projekteve publike, i cili kryesohet nga anëtari i KK-së, z.Muhamet Bytyçi, në mbledhjen e sotme, ka diskutuar për disa çështje, ndërsa ka dhënë disa rekomandime, kryesisht për përkujdesje të zonave të mbrojtura, si dhe ka diskutuar edhe për kadastrën dhe punën e kësaj drejtorie.

Ky komitet, në rend dite, kishte edhe zonat e mbrojtura në territorin e Komunës së Malishevës, ku dha disa rekomandime, për krijimin e një harte për zonat e mbrojtura të trashëgimisë kulture dhe trashëgimisë natyrore, shenjzimin dhe rrethimin e këtyre zonave dhe për mbledhjen e të dhënave të plota për këto zona, për dokumentimin e tyre, përfshi edhe fotografi, dhe ruajtjen e vazhdueshme të tyre.

Ndërsa në pikën për kadastër, drejtori i drejtorisë për gjeodezi dhe kadastër, z.Fadil Shala, i ka informuar anëtarët e komitetit, për procesin e rindërtimit të kadastrit në disa zona të Malishevës, pastaj i ka informuar edhe për aktivitetet në përgjithësi të drejtorisë, për të hyrat nga kjo drejtori, si dhe për çështje tjera me interes për komitetin, përderisa për të gjitha informacionet e kërkuara i ka pajisur me dokumentacion të plotë.

Anëtarët e komitetit, kanë kërkuar nga drejtoria, harmonizimin e dokumentacionit, me organet qendrore, përkatësisht me drejtorinë e rrugëve, pasi shpeshherë në këtë fushë janë shfaqur probleme të ndryshme.

Në dy pika tjera, që kishin të bëjnë me dy kontrata të punimeve, janë shtyrë, pasi sipas kryesuesit të komitetit, ende nuk i kanë marrë materialet e nevojshme, për trajtimin këtyre pikave.

## Pas një sëmundje të rëndë vdes mësuesi Daut Bytyçi

### Malishevë, 16 dhjetor



Me një mbledhje komemorative, të mbajtur sot në ambientet e shkollës në Kërvasari të Malishevës, sot është nderuar puna e mësuesit Daut Bytyçi nga ky fshat, i cili vdiq nga një sëmundje e rëndë. Kolektivit të shkollës, nxënësve dhe familjes, i shprehi ngushëllime edhe kryetari i Komunës së Malishevës, z.Ragip Begaj dhe drejtorja e arsimit në Malishevë.

“E bashkëndiej dhimbjen me ju mësues e nxënës të shkollës, pasi sot është ndarë nga ne një nga mësuesit më të mirë, por ju vazhdoni rrugën e tij. Mësuesi Daut, ka qenë një intelektual i kompletuar dhe vdekja e tij është një humbje e madhe, pasi kemi pasur ende nevojë për të”, tha kryetari i Malishevës, z.Ragip Begaj, në fjalën e rastit. Fjalën e tij, kryetari Begaj, e përmbylli me thënien “Mësuesi Daut, vdiq siç vdesin njerëzit e mëdhenj”, pasi ka lënë pas vetes një kontribut të madh në arsim.

Ndërsa mësuesit e kësaj shkolle, duke folur për mësuesin Daut Bytyçi, i cili vdiq, pas një sëmundje të rëndë, e vlerësuan lartë punën e tij 40 vjeçare në arsim dhe thanë se ka qenë “një mësues i dalluar në punë, mësues me shumë mirënjohje për punën e tij. Madje kontributin e tij në arsim nuk e ndali as në kohën sa ka qenë i sëmurë”. Sipas tyre, Daut Bytyçi, ka qenë mësues i urtë dhe i dalluar, ndërsa shkolla dhe fshati krenohen, pasi kanë pasur një mësues si Dautin.

## Kryetari Begaj, mbajti takimin e dytë publik me qytetarë

### Begaj: Mbi 31 kilometra rrugë të ndërtuara gjatë këtij viti

#### Malishevë, 18 dhjetor



Kryetari i Komunës së Malishevës, z. Ragip Begaj, në kuadër të përmbushjes së obligimeve ligjore, që kanë të bëjnë me organizimin e takimeve publike me qytetarë, sot ka mbajtur takimin e dytë publik, ku ka prezantuar punën e qeverisë komunale, për vitin 2014, si dhe ka dëgjuar nga qytetarët edhe hallet, problemet dhe nevojat që qytetarët kanë, e të cilat lidhen me punën e kryetarit dhe qeverisë komunale.

Në fjalën e tij, të mbajtur para qytetarëve prezent, kryetari Begaj, vitin 2014, e vlerësoi si një vit të suksesshëm, pasi janë realizuar qindra projekte të ndryshme, të cilat ndikojnë edhe në mirëqenien e qytetarëve të Komunës së Malishevës. “Vetëm në infrastrukturë rrugore, kemi investuar në mbi 31 kilometra rrugë, pastaj afro 37 kilometra kanalizime në fshatra, në ujësjellës, në bujqësi, në shëndetësi dhe të tjera”, tha kryetari Begaj. “Nëse pyetëm, se a është e mjaftueshme, unë them se nuk është e mjaftueshme puna që kemi bërë, nëse pyetëm, se a kemi pasur mundësi, mund të them se nuk kemi pasur më shumë mundësi, pasi kaq kemi buxhet dhe jemi të kufizuar, por angazhimi im personal dhe i tërë qeverisë komunale, ka qenë maksimal”, tha kryetari, duke prezantuar projektet e realizuara.

Sipas kryetarit Begaj, buxheti i planifikuar për investime kapitale, ka qenë 4 166 755 euro, ndërsa investimet, përfshi edhe donacionet, kanë qenë 4.4 milion ose rreth 300 mijë euro më shumë se planifikimi, ndërsa këtu, nuk janë të paraqitura projektet dyvjeçare, të cilat do të duhej të përfundojnë në vitin e ardhshëm.

Pas prezantimit, kryetari Begaj, është përgjigjur në të gjitha pyetjet e parashtruara nga ana e qytetarëve prezent në këtë debat, si dhe i ka evidentuar të gjitha sugjerimet, vërejtjet apo kërkesat e qytetarëve drejtuar kryetarit dhe komunës, e që lidhen me përditshmërinë tonë.

Në fund të këtij takimi, edhe kryesuesi i KK të Malishevës, z.Enver Hoti, paraqiti para të pranishmëve, punën e Asamblesë Komunale, dhe i njoftoi ata edhe adresimin e çështjeve të qytetarëve në raport me institucionet tjera, siç është çështje e kalimit në regjionin e Gjakovës dhe kundërshtimin e fuqishëm nga ana e Asamblesë, pastaj mos regjistrimin e studentëve malishevas në menzë dhe në konvikte të UP-së dhe për çështje tjera me rëndësi.

## U hap panairi i veshjeve dhe ushqimeve tradicionale

### Malishevë, 18 dhjetor



Organizuar nga shoqata “Fatjona”, sot në qendër të Malishevës, është hapur panairi i ushqimeve dhe punimeve të dorës, tradicionale, ndërsa në këtë panair po marrin pjesë shoqata apo individ nga të gjitha trevat kosovare, ku po prezantojnë veshjet dhe ushqimet tradicionale të vendit tonë.

Në hapjen e panairit mori pjesë edhe kryetari i Komunës së Malishevës, z.Ragip Begaj me bashkëpunëtor, i cili i uroi të gjithë pjesëmarrësit në këtë panair dhe ju dëshiroj suksese në punën e tyre. “Unë ju përgëzoj edhe për punën e juaj, që ju e ruani dhe e vazhdoni traditën tonë, si në veshjet, ashtu edhe në gatimet, që nënat tona na gatuanin neve”, tha kryetari Begaj, në fjalën e tij me këtë rast.

Panairi i veshjeve tradicional dhe ushqimeve tradicionale, do të qëndroj i hapur dy ditë në Malishevë, ndërsa shoqatën “Fatjona”, si organizatore e ka mbështetur Komuna e Malishevës, për mbajtjen e këtij panairi, i cili mbahet për herë të dytë brenda vitit në Malishevë.

## Kopja e altarit që i kushtohet hyjneshës “Nemezë” kthehet në Malishevë

### Malishevë, 18 dhjetor



Instituti Arkeologjik i Kosovës (IAK), sot ka kthyer në muzeun e Malishevës, artefaktin e Altarit të kultit, i cili ishte marrë nga IAK, për studime të mëtutjeshme, ndërsa ishte premtuar bërja e kopje të ngjashme për ekspozim në muzeun e Malishevës. Artefakti ishte gjetur në fshatin Banjë të Malishevës dhe është njëra nga gjetjet më të rralla të antikitetit dhe njëra nga dëshmitë më të rëndësishme, që tregon për qytetërimin e hershëm në këtë zonë.

Artefaktin, sot në muzeun e qytetit në Malishevë e kanë sjellë, drejtori i IAK-së z.Enver Rexha dhe hulumtuesi i IAK-së, z.Haxhi Mehmetaj, ndërsa pranimin e kopjes e kanë bërë kryetari i Malishevës, z.Ragip Begaj dhe drejtoresha për kulturë znj.Blerita Krasniqi.

Artefakti është i punuar në formë identike, me mermer cilësor të bardhë, i njëjtë me artefaktin e gjetur në Banjë.

Altari i kultit, i cili kushtohet hyjneshës Nemezë (latinisht: Nemesis), i takon vitit 250 të erës sonë dhe në të janë të skalitur tetë rreshta me shkronja latine, ku shihet edhe emri i hyjneshës Nemezë, ndërsa deshifrimi i plotë, do të sillet më vonë.

### **Begaj: 2014-ta vit i suksesshëm**

### Malishevë, 22 dhjetor

Qeveria komunale e Malishevës, e drejtuar nga kryetari i Komunës së Malishevës, z.Ragip Begaj, ka mbajtur takimin e rregullt të së hënës, ku kryetari Begaj, e ka vlerësuar si vit të

suksesshëm 2014-të, por ka kërkuar që në vitin 2015, të eliminohen të gjitha mangësitë eventuale që kanë mundur të evidentohen gjatë këtij viti.



“Është mirë që të bëhet analizë në secilën drejtori, për punën gjatë këtij viti dhe të bëhen parashikimet për vitin e ardhshëm. Duhet të evidentohen të gjitha ngecjet eventuale që kanë mundur të jenë shfaqur gjatë punës suaj, gjë që është normale, dhe të përmirësohen të gjitha këto ngecje, në mënyrë që të mos shfaqen gjatë viti të ardhshëm”, tha kryetari Begaj, para drejtorëve të drejtorive komunale.

“E di që ndoshta shpesh herë kam qenë kritik në punën tuaj, por këtë e kam bërë me qëllim, që të dalim sa më të suksesshëm në punën tonë të përbashkët dhe besoj ja kemi arritur, që të përmbysim një vit shumë të suksesshëm, por viti i ardhshëm duhet të jetë edhe më i suksesshëm”, tha kryetari Begaj, duke kërkuar edhe më shumë angazhim në vitin 2015.

Në mbledhjen e rregullt të Këshillit të Drejtorëve, drejtorët e drejtorive, kanë raportuar për punët gjatë javës që lamë pas dhe për përgatitjet për javën tjetër, si dhe për përfundimin e raporteve për këtë vit.

Përndryshe, në këtë mbledhje, u bë e ditur, se buxheti komunal është shpenzuar mbi 98 për qind, ndërsa projektet e ndërtimit kanë përfunduar për këtë vit, e tani jemi në fazën e pranimeve teknike të projekteve.

Po ashtu, u bë e ditur, se ka filluar të rritet numri i qytetarëve që kërkojnë rregullimin e dokumenteve personale, kjo për shkak të ardhjes së mërgimtarëve në fundvit, por shërbimet komunale, me sukses janë duke i kryer shërbimet dhe nuk ka vonesa në këtë drejtim.

Edhe sipas inspektorëve nga ministria, në Komunën e Malishevës, nuk ka gabime gjatë kryerjes së këtyre shërbimeve nga gjendja civile, si dhe nuk ka as ankesa dhe as vërejtje për kryerjen e shërbimeve.

## KKSB mbajti mbledhjen e fundit për vitin 2014

### Malishevë, 23 dhjetor



Këshilli Komunal për Siguri në Bashkësi (KKSB), i drejtuar nga i pari i komunës, z.Ragip Begaj, ka mbajtur mbledhjen e gjashtë të radhës dhe të fundit për vitin 2014, ndërsa në këtë mbledhje edhe njëherë u vlerësua se Komuna e Malishevës, vazhdon të mbetet si komuna më e sigurt, në aspektin e sigurisë së përgjithshme dhe pa tendenca të prishjes së këtij imazhi të mirë për Malishevën.

“Malisheva vazhdon të mbaj primatin e komunës më të sigurt në vend, pavarësisht rasteve të izoluara që mund të ndodhin dhe këtë vlerësim për Malishevën e japin të gjitha raportet nga organet e rendit dhe të sigurisë në vend”, tha në fillim të këtij takimi, kryetari i Komunës së Malishevës, z.Ragip Begaj.

“Gjatë këtij muaji, edhe pse ka ndodhur një aksident me ngrohjen në një shkollë, ku humbi jetën një person, megjithatë situata e sigurisë mbetet e mirë, stabile dhe pa tendencë të prishjes së kësaj suate”, tha kryetari Begaj.

Edhe komandanti i stacionit policor në Malishevë, kapiteni Halil Morina, bazuar në të dhënat policore vlerësoi situatën e qetë dhe stabile, ku sipas tij, numri i krimeve në raport me muajin paraprak ka rënie të dukshme, ndërsa bashkëpunimi me qytetar, sipas kapitenit Morina, është shumë i mirë.

Drejtori i drejtorisë për mbrojtje dhe shpëtim, z.Ahmet Morina, i falënderoi të gjitha organet e sigurisë dhe të rendit, për bashkëpunimin e mirë me drejtorinë që udhëheq dhe uroi që ky bashkëpunim të vazhdoj edhe në vitet e ardhshme.

Përndryshe, edhe në këtë mbledhje, u fol edhe për shqetësimin e qytetarëve, për rrezikun nga qentë endacak.



## **KK i Malishevës mbajti mbledhjen e fundit për këtë vit**

### **Malishevë, 29 dhjetor**

Kuvendi Komunal i Malishevës, i kryesuar nga kryesuesi z.Enver Hoti, ka mbajtur sot mbledhjen e fundit për vitin 2014, ku janë trajtuar disa çështje, siç ishte miratimi i listës për kryetarët e fshatrave, ridizajnimi i sallës së kuvendit dhe disa çështje nga komiteti i arsimit.

Fillimisht, nënkryetari i Komunës së Malishevës, z.Rexhep Mazreku, paraqiti para anëtarëve të Kuvendit të Komunës, një fjalim përmbyllës, lidhur me punën e ekzekutivit, të arriturat dhe sfidat gjatë vitit 2014, vit i cili, sipas nënkryetarit Mazreku, ka qenë një vit i suksesshëm, ku janë realizuar shumë projekte me rëndësi, investime nga të cilat, kanë përfituar secili fshat, së paku një projekt.

Më pas, komisioni për organizimin dhe monitorimin e zgjedhjeve në fshatrat dhe vendbanimet e Komunës së Malishevës, i kryesuar nga anëtari i KK-së, z.Rrahim Morina, paraqiti punën e komisionit dhe listën me emrat e kryetarëve të rinj të fshatrave, raport dhe listë e cila u miratua nga ana e KK-së.

Pas kësaj, me kërkesën e anëtarëve të KK-së, u mor vendim që të ridizajnohet salla e Kuvendit të Komunës, në mënyrë që të krijohet kushte më të mira për punën kuvendit.

Në fund, KK, mori disa vendime, që kanë të bëjnë me komitetin për arsim, kulturë, rini dhe sport, siç është përbërje e re e këtij komiteti, që do të ketë pesë anëtar, pastaj u mor vendim për funksionalizimin e një komisioni të këtij komiteti, si dhe u miratua edhe kërkesa e këtij komiteti, që trupat e kuvendit, ti mbajnë takimet nga ora 14:00, për shkak se disa nga anëtarët e këtyre trupave, janë mësimdhënës dhe mbajtja e mbledhjeve, në orët më të hershme, po ndikon në procesin mësimor.

## **Komiteti për Diasporë mbajti mbledhjen e fundit për këtë vit**

### **Malishevë, 30 dhjetor**

Komiteti për diasporë, i drejtuar nga kryetari i saj z.Besnik Hoti, ka mbajtur sot mbledhjen e katërt të rregullt dhe në të njëjtën kohë të fundit për këtë vit, duke bërë përmbylljen e vitit 2014.



Komiteti për diasporë ka përshëndetur funksionalizimin e një zyre për bashkatdhetarët e cila është miratuar nga Kuvendi Komunal .

Kryesuesi i Komitetit për Diasporë, z.Besnik Hoti në takimin përmbyllës të vitit 2014 tha se “si komitet jemi angazhuar dhe jemi munduar të bëjmë një punë të mirë, brenda mundësive dhe kapaciteteve tonave jemi mundu që pak a shumë të merremi me çështjet dhe problematikat e bashkatdhetarëve tanë, sidomos tash sa janë këtu”.Gjatë këtij viti ne kemi diskutuar dhe jemi mundu që të japim ide të nxjerrim konkluzione për çështje të ndryshme të bashkatdhetarëve, si për hapjen e një zyre, organizimi i një takimi me ta, diskutimi rreth njoftimit të veprimeve, aktiviteteve të punës së tyre në botën e jashtme dhe të tjera” tha Hoti.

Angazhimi i komitetit për Diasporë për vitin e ardhshëm do të jetë edhe më i madh dhe do të jenë shumë më aktiv, në mënyrë që edhe ti realizojnë synimet dhe obligimet e komitetit.

## Gëzim Elshani, sportisti i vitit në Malishevë, me 13 medalje ari

### Malishevë, 30 dhjetor



Drejtorja për Kulturë, Rini dhe Sport, në kuadër të aktiviteteve tradicionale, për shpalljen e më të mirëve të vitit, sot ka shpallur më të mirët e vitit 2014 në fushat e sportit, rinisë, leximit, nxënësve më të mirë, si dhe ka ndarë mirënjohje edhe për bashkatdhetarët, që kanë dhënë kontribut në këto fusha. Sportisti i vitit u shpall Gëzim Elshani.

Nënkryetari i Komunës së Malishevës, z.Rexhep Mazreku, duke marrë fjalën e rastit, përmbylljen e 2014-ës, e cilësoi si “një përmbyllje e një viti të suksesshëm në të gjitha fushat dhe për të gjitha klubet e kulturës dhe sportit”. “Po ashtu shfrytëzoj rastin ti falënderoj të gjithë ata aktivistë që kanë dhënë kontribut në kulturë dhe sport, ndër vite, duke e mbajtur gjallë sportin dhe kulturën edhe në kohët e vështira”, tha Mazreku. “Malisheva ka talent të shumtë, por duhet që të punohet sistematikisht në ngritjen e këtyre talenteve”, tha në fund nënkryetari Mazreku, duke ju bërë thirrje arsimtarëve, që të punojnë edhe më shumë me këta fëmijë talent.

Ndërsa drejtoresha e Drejtorisë për Kulturë, Rini dhe Sport, i ka përshëndetur dhe i ka falënderuar të gjithë “ata që kanë dhënë kontribut në kulturën dhe sportin në Komunën e Malishevës dhe të gjithë ata që me dinjitet e përfaqësojnë Malishevën dhe Kosovën në arenën ndërkombëtare”. Po ashtu drejtoresha Krasniqi, i ka falënderuar edhe bashkatdhetarët tanë që kanë dhënë kontribut në të gjitha fushat.



Më pas janë ndër mirënjohje për bashkatdhetarët tanë që kanë kontribuar në ngritjen e një kabinetit të informatikës në një nga shkollat e Malishevës, pastaj për mësuesit e dalluar, nxënësit e dalluar të viti, sikur edhe lexuesit më të mirë dhe aktivistët e rinisë.

Pas këtyre, janë shpallur edhe sportistët e vitit në të gjitha llojet e sporteve, të zhvillohen në Komunën e Malishevës, dhe në fund, janë shpallur më të mirët e vitit, ku sportist i viti është shpallur Gëzim Elshani, anëtar i kubit të notit “Besa”, i cili i ka fituar 13 medalje të arit, klubi më i mirë është shpallur klubi i notit “Besa” nga Banja dhe trajner i viti, trajneri i kubit “Besa”, Adrian Telaku.

Një mirënjohje e veçantë, është ndarë edhe për kikkoksierin Dardan Morina, kampion i botës në kikkoks, i cili është Drenovci i Malishevës, por garon për shtetin gjerman.